

Tutu ñanoó ña n̄itāa taPedro ña ti'ví ra kua'an nda'a n̄ivi na kándixa Jesucristo

*TaPedro ti'ví to'on yó'o
kua'an ña chindeé ra n̄ivi na kándixa Jesucristo*

¹ Yi'i, taPedro, ñii taapóstol ta kisa chiño noo Jesucristo kúu. Ta táa i tutu yó'o xaã ña nda'a ndó'ó, n̄ivi na kándixa Jesucristo, na kúu na n̄ixita ní'no ta táku ndó ñoo n̄ivi na on s̄ivi kúu naño m̄i ndó. Ta ñoo x̄iyo noo táku ndó vitin kúu ña ñó'o kua'a xiiña ña nañi Ponto, Galacia, Capadocia, Asia x̄i'in Bitinia. ² Yivá yó Ndios nda ñanoó xa x̄ini ra ndó'ó ta naq̄axin ra ndó'ó ña kuu ndó sa'ya ra. Ta x̄i'in Ním̄a ra k̄isa ndivi ra ña kuu ndó n̄ivi na ndii noo ra. Ta ke'é ra ñayó'o x̄i'in ndó chi kóni ra ña kasa ndivi ndó to'on ña n̄ika'an ra, ta kóni ra ña nakata ra kuachi ndó x̄i'in n̄i Jesucristo ña n̄ixita nda'a tón cruz. Ta vitin kóni i ña ke'é Ndios ví'í ní ka ñava'a x̄i'in ndó, ta ná taxi ra ñava'a koo ini ndó. Ta ná kutú ndaã ini ndó x̄i'in ndi'i ñava'a yó'o.

*To'on yó'o ká'an ndasaá x̄ini ñó'ó kutaku yó
ta kundati yó ñava'a noo Ndios*

³ Ta ná kasa ká'no yó Ndios, ta kúu Yivá Jesucristo, Taã taKá'no noo yó. Saá chi Ndios kúnda'ví ní ini ra x̄ini ra m̄i yó, ta ke'é ra ña kaku xaá yó noo ra, chi sanataku ra Jesucristo noo ña n̄ixi'i ra. Ta xa'a ña n̄ataku Jesucristo,

ndino'o ndáa ini yó ta ndáti yó naki'in yó ñava'a k̄indoꝝ Ndios taxi ra nda'a yó. ⁴ M̄ji ñava'a yó'o ña ndáti yó xa yóo va'a ña ñoyívi n̄ino, ta nda ñii k̄iv̄i ɔn kukini ña, ni ɔn tiv̄i ña, ta nda lo'o ɔn ndi'i xa'a ñava'a yó'o. ⁵ Chi xa'a ña ndino'o ndáa ini yó Ndios, Ndios xí'in ndee ra ndixa ndáa ra m̄ji yó, xa'a ña sakaku va'a ra yó. Saá chi ña ke'é ra saá kúu ña ch̄itón̄i Ndios, ta sanat̄ivi ra ñayó'o n̄oꝝ n̄ivi tá kixaa k̄iv̄i sondí'í ñoyívi.

⁶ Ñakán ná kunakaa ñasij̄ ini ndó, vará x̄in̄i ñó'ó x̄o'v̄i ndó kua'a ní n̄oꝝ ñayo'v̄i ña koto ndoso ndó'ó, ta ña x̄o'v̄i ndó vitin lo'o kuiti k̄iv̄i kundo'o ndó saá. ⁷ Kixaa ñayo'v̄i n̄oꝝ ndó ña koto ndoso ña ndó'ó án ndixa ndino'o ini ndó kándixa ndó Jesucristo, chi ña kándixa ndó ra ndatán yóo kaa oro, saá yóo ña. Ta ndatán yóo ño'o ña x̄ix̄i, saá yóo ñayo'v̄i x̄o'v̄i ndó, saá chi ño'o ña x̄ix̄i xá'mi ña ndi'i kaa v̄ichí ña ndoꝝ ndaa xí'in oro, ta ndi'i xa'a ñakaa ɔn vá'a yó'o, ta saá kindoꝝ kuiti nina m̄ji oro. Ta ña kándixa ndó Ndios ta ña kúndeé ini ndó xí'in ñayo'v̄i ña x̄ito ndoso ndó'ó, ndáya'ví ní ka ñayó'o n̄oꝝ ña kúu kaa oro, chi ndi'i xa'a ña kúu oro ñii k̄iv̄i vaxi. Ta ndó'ó, tá ɔn vása sandakoo ndó ña va'a kándixa ndó Ndios, ta k̄iv̄i ndikó Jesucristo ñoyívi yó'o ta ndi'i n̄ivi kuchiño koto na ra, ta saá Ndios kasa ká'no ra ndó'ó, ta taxi ra ñato'ó nda'a ndó.

⁸ Vará ɔn t̄a'án koni ndó Jesucristo xí'in nduch̄u n̄oꝝ ndó, ta ndó'ó kí'vi ní ini ndó x̄ini ndó ra, ta kándixa ndó ra. Ta ká'no ní ñasij̄ nákaa ini ndó, t̄anda ni ɔn vása nání'i ndó t̄o'on ña nandaxin ndó ndasaá yóo ñasij̄ nákaa ini ndó.

⁹ Ta kúsij̄ ní ini ndó vitin chi kúndaꝝ ini ndó ndí

Ndios xa sakaku ra ndó'ó xa'a ña kándixa ndó Jesucristo.

10 Naprofeta na nika'an ndoso to'on Ndios kuiya xina'a, nayó'o ví'í ní ka'vi na ta vivíi sakuá'a na xa'a ña kunda'a ini na ndasaá ke'é Ndios ña sakaku ra ñivi. Ta ndato'on na xí'in ñivi xa'a ñava'a saní'i Ndios mji yó chi ta ká'no ní ini kúu ra. 11 Níma Ndios* nika'an ña ini naprofeta, ta ndato'on ña xí'in na ndasaá koo ña xo'vi Cristo, ta ta ti'vi Ndios ñoyívi yó'o ña sakaku ra ñivi, ta ndato'on ña ndasaá koo ña ká'no ní ñato'ó naki'in ra sonđi'i. Ta Níma Ndios ndato'on ña ndi'i ñayó'o kuiya xina'a, tá'an kumanj kua'a ní ka kuiya ña kixa'a ña kundivi ñayó'o. Ta saá naprofeta yó'o ka'vi na ta sakuá'a na ndasaá kunda'a ini na yu kuu Cristo, ta ama kundivi ñayó'o. 12 Ta Ndios nandaxin ra noo naprofeta ndí on sivi xa'a kivi ña táku mji na kúu ña ká'an ra xí'in na, ta xa'a kivi ña táku mji yó vitin kúu ña nika'an ndoso na kuiya xina'a. Ta mji to'on va'a nika'an ndoso nayó'o xina'a, vitin inká ñivi xí'in ndee Níma Ndios ndato'on na to'on yó'o xí'in ndó xa'a Jesucristo. Ta anda naángel kóni na kunda'a ini na xa'a ñava'a ke'é Ndios xí'in mji yó.

To'on yó'o ká'an ndí Ndios kóni ra ña kutaku ndii yó noo ra

13 Ñakán kani va'a sinj ndó ndasaá koo kasa ndivi ndó ña xá'nda chiño Ndios. Koo ti'va ndó ña nasita xí'in mji ndó noo ña on va'a, ta ndino'o ní ini ndó kandixa ndó ndí Ndios ndixa taxi ra

* **1:11** Níma Ndios ñii kúu ña xí'in Níma Jesucristo.

ñava'a nda'a ndó kivi kixi tuku Jesucristo ñoyívi yó'o. ¹⁴ Chi xini ñó'ó kasa ndivi ndó ña ká'an Ndios, ndátan yóo naválí na kisa ndivi to'on ká'an yivá na, saá kasa ndivi ndó. Ta vitin on kutaku ka ndó kasa ndivi ndó ña on vá'a kóni yiki koñu ndó, ndátan xitaku ndó kivi xikuu ndó nivi na naa ini. ¹⁵ Ta saá nda víka xini ñó'ó kundikon ndó ko'on ndó yichi va'a, ta kutaku ndii ndó noo Ndios, chi Yivá yó Ndios ta kana mji yó nduu yó sa'ya ra, kúu ra ta ta ndino'o ndii. ¹⁶ Chi noo to'on Ndios ña nita na xina'á, nika'an ra xí'in nivi na ndikon ña'á, kachi ra saá: "Xini ñó'ó kuu ndó nivi nayji na kutaku ndii noo i, chi yi'i kúu ta tayi", kachi Ndios.

¹⁷ Ta ndó'ó ká'an ndó ndúkú ndó ñava'a noo Ndios, ta kachi ndó Yivá ndó kúu ra, ta saá, xini ñó'ó kunda ini ndó ndi Ndios on vása nakaxin ra nivi, ta kúu ra ta ndasaá kuiti xí'in ñanda kasa nani ra xa'a ndi'i ña ké'é nivi ñoyívi yó'o, ta xa'a ñayó'o xini ñó'ó xí'in ñato'ó kasa ndivi ndó ña kóni ra ndi'i saá kivi ña táku ndó ñoyívi yó'o.

¹⁸ Chi xini ndó Ndios sakaku ra ndó'ó noo yichi yata ña on vása ndaya'vi ña nixika ndó si'na, chi naxi síkuá ndó kúu na saná'a ndó'ó yichi yata yó'o. Ta on sivi xí'in oro ta ni on sivi xí'in plata, kúu ña cha'vi Ndios xa'a ña sakaku ra ndó'ó noo ña ku'an ndó yichi yata, chi ñaoro xí'in ñaplata ñii kivi ndi'i xa'a ñayó'o. ¹⁹ Ta xí'in nji Jesucristo ña ndaya'vi ní ña nixita nda'a tón cruz kivi nixi'i ra, kúu ya'vi ká'no ní cha'vi ra xa'a ña sakaku ra ndó'ó. Ta ndátan yóo ñii ndikachi lo'o tí ndii ndino'o, ta on ko' ña on vá'a kómí rí, tí sóko nasutu noo Ndios xa'a kuachi nivi, saá nixiyo

Jesucristo. ²⁰ Ta ɔn t̄a'án k̄a kuva'a ñoyívi yó'o, ta Ndios ch̄indú'u ra ndí Jesucristo kuu t̄a t̄a kasa ndivi chiño yó'o. Tá xa v̄axi yatin k̄iv̄i sondí'í, ta Ndios t̄i'v̄i ra Jesucristo k̄ixāa ra ñoyívi yó'o. X̄a'a ña kí'vi ní ini ra x̄íni ra ndó'ó, k̄ixāa ra ña sak̄aku ra ndó'ó. ²¹ X̄a'a ñava'a k̄isa ndivi Jesucristo kúu ña ndáa ini ndó Ndios, t̄a t̄a sanatak̄u Jesucristo, ta t̄axi ra ñat̄o'ó ká'no nda'a ra ñoyívi ñino. Ta ñakán ndino'o ini ndó kándixa ndó Ndios, ta ndáa ini ndó ra ña ndáti ndó kasa ndivi ra t̄o'on ña k̄ind̄o ra x̄í'in ndó.

²² Ta vitin x̄a'a ña k̄isa ndivi ndó t̄o'on ña ndaa ñika'an Ndios, ta Níma Ndios k̄isa chiño ña ini ndó ña nduu ndó ñivi na ndii ño Ndios. Ta x̄a'a ñayó'o kómí ndó ndee Ndios ña kúchiño kuki'vi ndino'o ini ndó koni tá'an ndó. Ta saá x̄ín̄i ñó'ó kuki'vi ini ndó koni tá'an ndó x̄í'in ndi'i ndee ndó. ²³ Chi Ndios t̄axi ra ña k̄aku x̄aá ndó vitin, ta ɔn s̄iv̄i ñii kúu ñayó'o x̄í'in ña si'na k̄aku ndó t̄ixin si'í ndó ñoyívi yó'o, chi ndi'i ñivi na k̄aku ñoyívi yó'o kixāa ña k̄iv̄i nayó'o. Ta vitin x̄í'in ndee t̄o'on Ndios ndó'ó k̄aku x̄aá ndó, ta saá kutak̄u ndó x̄í'in Ndios ndi'i saá k̄iv̄i. Saá chi t̄o'on Ndios ɔn vása ndi'i x̄a'a ña, táku t̄o'on ra ndi'i saá k̄iv̄i. ²⁴ Chi t̄o'on Ndios, ña ñitaa ñii t̄aprofeta x̄ina'á, káchí ña saá:

Ndi'i ñivi ndatán yóo ku'u kuí, saá yóo na.

Ñaká'no livi ña kómí ñivi, yóo ña ndatán yóo yita livi ña xá'no ño ku'u kuí.

Chi ku'u kuí yíchi ña, ta ñii k̄i'va saá yíchi yita livi x̄í'in ña, ta nakava ña ño ño'o ta ndi'i x̄a'a ñayó'o;

²⁵ ta t̄o'on Ndios, ɔn vása ndi'i x̄a'a ña, ta táku ña ndi'i saá k̄iv̄i ña v̄axi,

káchí tɔ'on Ndios ña n̄taa ñii taprofeta. Ta tɔ'on Ndios yó'o, kúu tɔ'on v̄a'a ña n̄ika'ʌn ndoso na nɔɔ ndó.

2

¹ Ñakán xín̄i ñó'ó sandakoo ndó ké'é ndó ndi'i nɔɔ ña ɔn vá'a, ɔn ka'ʌn ka ndó tɔ'on vatá, ta ni ɔn sandá'ví ndó ink̄a n̄ivi; ɔn kuu ka ndó n̄ivi na ɔv̄i yu'u; ɔn kasa kuín̄i ini ndó xí'in tá'an ndó; ta ɔn ka'ʌn ndó tɔ'on visi xa'a ink̄a n̄ivi. ² Ndatán yóo napá'á válí na s̄akán k̄aku, ta xí'j̄ na s̄oko ta xí'in ndino'o ini na ndúkú na ña chichín na, saá xín̄i ñó'ó nandukú ndó ndi'i ña nina v̄a'a ña taxi vivíi kua'no ndó yich̄i Ndios, saá xín̄i ñó'ó kutak̄u ndó nd̄a kixaā k̄iv̄i ña naki'in ra ndó'ó ta kutak̄u ndó xí'in ra ndi'i saá k̄iv̄i. ³ Chi ña v̄axi kua'no ndó saá, ta ndixa xa kúndāa ini ndó ndí Jesucristo kúu t̄a t̄a v̄a'a ní.

Tɔ'on yó'o ká'ʌn ndí Jesucristo yóo ra ndatán yóo yūu ká'no ña táku

⁴ Kuyatin ka ndó nɔɔ Jesucristo, T̄a t̄aKá'no nɔɔ yó; ndatán yóo ñii yūu ká'no ña táku, saá yóo ra. Vará n̄ivi s̄akana na yūu yó'o, ta Ndios n̄akaxin ra yūu yó'o kuu ña yūu nɔɔ ña kunakāa xa'a ve'e. ⁵ Ta saá ndó'ó, ndatán yóo kua'a ní yūu táku, saá yóo ndó. Ta Ndios xín̄i ñó'ó ra ndó'ó ña kasa v̄a'a ra ve'e ño'o ra. Ta ndatán yóo nasutu ȳj̄, saá yóo ndó nɔɔ Ndios ña sóko ndó nɔɔ ra ña kúu ña s̄akusij̄ ini ra, ta xa'a ndi'i ña k̄isa ndivi Jesucristo, Ndios ndixa náki'in ra ña sóko ndó nɔɔ ra. ⁶ Chi tɔ'on ña n̄ika'ʌn Ndios ña n̄taa taprofeta x̄ina'á, káchí ña saá:

Kani ndichij ñii yuü ká'no ña kúu ñanoó ña kunakaá t̄iton xa'a ve'e ña kuva'a x̄iki Sion.*

Nakaxinj ña kuu ña yuü ña ndáya'ví ní, ña ká'no ka noo ndi'i inka yuü ña ñó'o ve'e ño'o j.

Ta ndatán yoo yuü yó'o, saá yoo taá ta nakaxinj; chi tayó'o kuu ta ndáya'ví ní, ta tanoó kuu ra noo ndi'i nañoó j,

ta ndi'i ñivi na kándixa taá ta nakaxinj yó'o, andá ñii kivi on vása kuka'an noo ñivi yó'o chi on sandá'ví ra na,

káchí to'on Ndios. ⁷ Ta ndó'ó ñivi na kándixa Jesucristo, ndatán yoo yuü ká'no ña ndáya'ví ní, saá yoo ra noo ndó, ta noo inka ñivi na on xiin kandixa Jesucristo, on vása ndáya'ví ra noo na, ta saá kúndivi to'on Ndios ña káchí saá:

Yoo yuü ña ñi-xiin ñivi na kisa va'a ve'e konj ñó'ó na,

ta m̄ii yuü yó'o nduu ña yuü ñanoó nákaa xa'a ve'e,

saá káchí to'on Ndios. ⁸ Ta tuku ká'an to'on Ndios, káchí ña saá:

Yuü yó'o kúu ña káchí'i xa'a ñivi ta ñáni na, káchí to'on Ndios. Ndi'i ñivi na káchí'i xa'a ta ñáni na sata yuü yó'o kúu ñivi na on xiin chikaa so'o, ta ni on xiin na kasa ndivi na to'on ña ká'an xa'a Jesucristo. Ta Ndios xa chitóni ra saá kundo'o ñivi na on xiin konj so'o to'on ra.

To'on yó'o ká'an xa'a ñivi na kúu nañoó Ndios

⁹ Ta ndó'ó, on sivi ñivi na on xiin kandixa Jesucristo kúu ndó. Ndios nakaxin ra ndó'ó kuu ndó sa'ya m̄ii ra. Ta kúu ndó nasutu na kisa

* **2:6** Noo x̄iki Sion nákaa ñoo Jerusalén vitin.

chiño noo taRey Jesucristo, ta nañoo yij Ndios kúu ndó'ó. Ndios kúu ta ta kana ndó'ó ta tava ra ndó'ó noo yichij naa ña on vá'a xitaku ndó, ta vitin va'a táku ndó ku'a'an ndó yichij noo yé'e ño'o livi ní Ndios. Naḡaxin ra ndó'ó xa'a ña ka'an ndoso ndó xí'in nivi ña kundaa ini na xa'a ndi'i ñava'a ké'é Ndios. ¹⁰ On sivi nivi na kándixa Ndios xikuu ndó si'na, ta vitin nañoo Ndios kúu ndó; si'na nixika ndó yichij noo nisa'a ini Ndios xini ra ndó'ó, ta vitin Ndios xa sakaku ra ndó'ó, ta ndixa kisa ká'no ini ra xa'a ndó.

Tɔ'on yó'o ká'an ndí xini ñó'ó kasa ndivi yó ña ká'an Ndios

¹¹ Nañani yó xí'in náki'va yó, na kí'vi ní ini j xini j kúu ndó. Ndatán yóo nivi na yá'a ku'a'an kuiti, saá yóo ndó táku ndó ñoyivi yó'o. Ta saá xáku ndá'viji noo ndó, on taxi xí'in mji ndó ña kasa ndivi ndó ña on vá'a kóni yikí koñu ndó, chi ña on vá'a kóni yikí koñu ndó káni tá'an ña xí'in ñava'a kóni níma ndó. ¹² Ta va'a vivíi kutaku ndó noo nivi na on xjin kandixa Ndios. Vará ká'an na ña on vá'a xa'a ndó, ta saá tá xito na ñava'a ké'é ndó, ta saá kasa ká'no na Ndios xa'a ñava'a yó'o kivi kasa nani Ndios xa'a kuachi ndi'i nivi.

¹³ Chi xa'a ña ndíkɔn ndó Jesucristo, xini ñó'ó kasa tɔ'ó ndó ta kasa ndivi ndó chiño va'a ña ndúkú nivi na xá'nda chiño noo ndó, án tarey ká'no kúu ra, ¹⁴ án inká naná'no na sakuiso chiño tarey kúu na. Chi tarey taxi ra ndayí nda'a naná'no yó'o ña saxo'vi na nivi na ké'é ña on vá'a, ta taxi ra ndayí nda'a na ña ka'an na tɔ'on va'a ña kasa tɔ'ó na nivi na ké'é chiño va'a. ¹⁵ Chi

Ndios kóni ra kasa ndivi ndó ñava'a, ta saá ñivi na naa ini xí'in ñivi na yá'a s̄inj̄ on kuchiño na naní'i na to'on ndiva'a ka'an na xa'a ndó.

¹⁶ Ndatán yóo ñivi na xíka ndíka, saá táku ndó. Chi on s̄iví ka ndayí kúu ña xá'nda chiño noo ndó. Ta saá vitin táku ndíka ndó xa'a ña kasa ndivi ndó ña kóni Ndios, ta on vá'a ndikó ndó kasa ndivi ndó ña xá'nda chiño ña on vá'a. Va'a kasa ndivi ndó chiño ña kóni Ndios, chi ñivi na kisa chiño noo Ndios kúu ndó. ¹⁷ Kasa to'ó ndó ndi'i ñivi. Ta ndixa kuki'vi ini ndó koni ndó nañani ndó xí'in náki'va ndó na kándixa Jesucristo. Ta ndixa kasa ká'no ndó Ndios. Ta kasa to'ó ndó tarey ta xá'nda chiño ñoo ndó.

¹⁸ Ndó'ó naesclavo, xín̄i ñó'ó kasa ndivi ndó ña xá'nda chiño tapatrón ndó ta kasa to'ó ndó ra. Saá ke'é ndó xí'in ra tá va'a ta kúu ra, ta va'a ini ra, ta ñii k̄i'va saá va'a ke'é ndó xí'in ra tá on vá'a ta kúu ra, ta kúu ra ta ta ndiva'a ní ini. ¹⁹ Ta ñivi na xín̄i ke'é ñava'a ña kóni Ndios ta kisa ndivi na ñava'a yó'o, ta saá ni, ta yóo ink̄a ñivi ta s̄axo'vi na nayó'o, ta ñivi na ké'é ñava'a yó'o ta kúndeé ini na xí'in ña xó'vi na, ta saá naki'in na ñava'a nda'a Ndios. ²⁰ Ta ndó'ó, tá ke'é ndó ña on vá'a ta kúndeé ini ndó xí'in ña xó'vi ndó xa'a ña on vá'a ke'é ndó, ta noo Ndios on vá'a ndáya'ví ña kúndeé ini ndó xí'in ña xó'vi ndó. Ta saá ni, tá ke'é ndó ñava'a, ta xó'vi ndó xa'a ñava'a ke'é ndó, ta kúndeé ini ndó xí'in ña xó'vi ndó, ñayó'o kúu ña kóni Ndios, ta ndáya'ví ní ña noo ra. ²¹ Ndios kana ra ndó'ó kundikon ndó yich̄i Jesucristo, ta ndatán xí'in ña ká'no ini Jesucristo ñix̄o'vi ní ra xa'a ndó, ñii k̄i'va saá xín̄i ñó'ó ká'no koo ini ndó ta kúndeé ndó xí'in ña

xó'v̄i ní ndó. ²² Ta Jesucristo, aṅḁa ñii k̄iv̄i ɔn vása ní-ke'é ra ña ɔn vá'a, ta ni ɔn vása ní-ka'an ra ñavatá, ni nda lo'o n̄i-sandá'ví ra n̄ivi. ²³ Ta saá ni, n̄ivi n̄ika'an na to'on ña kándiva'a xí'in ra, ta m̄ii ra aṅḁa lo'o n̄i-ndikó ra ka'an ra to'on ndiva'a xí'in na. Tá n̄ivi saxo'v̄i ní na ra, ta m̄ii ra ɔn vása ní-ka'an ra xí'in n̄ivi yó'o ndí ñii k̄iv̄i cha'vi na xa'a ña saxo'v̄i na ra. Saá chi ndáa ini ra Ndios ña kasa nani ra xí'in ñandaḁa xa'a ndasaá yóo ña ke'é ñii ñii n̄ivi. ²⁴ M̄ii Jesucristo naḁuiso ra ndi'i kuachi yó k̄iv̄i n̄ixi'i ra nda'a tón cruz. N̄ixo'v̄i ra saá xa'a yó ña kuchiño sandakoo yó kuachi yó ta ɔn ke'é ka yó ña ɔn vá'a, ta kuchiño kutaku yó kasa ndivi yó ña kóni Ndios. Ta xa'a ña taḁué'e ȳikí koñu Jesucristo kúu ña nduḁa'a yó. ²⁵ Ndatán yóo ndikachi tí ndaño'ó noḁ xito'o rí, saá n̄ixiyo ndó si'na. Ta vitin xa n̄andikó ndó noḁ Jesucristo, ta kúu taḁa ta ndáa ndó'ó. Ndatán vivíi ndáa ñii taḁa ndikachi saṅa ra, saá vivíi ndáa Jesucristo ndó'ó ndi'i saá k̄iv̄i, ña ɔn ndi'i xa'a ndó.

3

To'on yó'o ká'an ndasaá xini ñó'ó kutaku n̄ivi na xa tonda'a

¹ Ta ndó'ó, náki'va yó ná yóo ȳii, xini ñó'ó kasa to'ó ndó ȳii ndó, ta kasa ndivi ndó ndi'i chiño va'a ña ndúkú ȳii ndó noḁ ndó. Ta saá, tá ɔn s̄iv̄i na kándixa to'on ñava'a xa'a Jesucristo kúu ȳii ndó, ta xa'a ña xito na va'a táku ndó xí'in na, ta saá chikaḁa ini na kandixa na Jesucristo, vará ɔn ta'an ka'an ndó xí'in na xa'a ra. ² Kuchiño ȳii ndó kandixa na to'on va'a xa'a Jesucristo chi

xító na ndixa táku ndii ndó, ta kisa ndivi ndó ña kóni Ndios. ³ On chinóo ní ndó ke'é ndó ndasaá kuiti xa'a ña ndasa livi xí'in mji ndó. Saá chi ña ndixa ndása livi náña'a on sivi ña livi nó'ni yisi sivi ná kúu ña, ni on sivi ña ndóo ndaa xí'in mji ná ña kúu ka oro, ni on sivi ña ndixin ná tikoto livi ña yá'ví ní kúu ña. ⁴ Ta va'a ka kundi'i ini ndó, ta chika ndó ndee xí'in mji ndó ña va'a koo ini ndó noo Ndios. Chi náña'a ná va'a ini ta to'ó ini kúu ná ndixa livi ndino'o ta ndaya'ví ní ka náyo'o noo Ndios. Saá chi ña livi ini náyo'o nda ñii kivi on vása ndi'i xa'a ña. ⁵ Ñii ki'va saá náña'a ná kandixa Ndios kuia xina'á xikuu ná ná livi ini noo Ndios. Saá chi xindaa ini ná Ndios ña kisa ndivi ra ña nika'an ra, ta kisa to'ó ná yij ná ta kisa ndivi ná chiño va'a ndukú yij ná noo ná. ⁶ Ñii ki'va saá ke'é ña Sara xina'á, chi kisa ndivi ña ndi'i ñava'a nika'an yij ña ta Abraham xí'in ña, ta xika'an ña to'on yó'o xí'in ra: "Tata, mji taká'no noo i." Ta ndó'ó náki'va yó, tá ké'é ndó ñava'a ta on vása yí'ví ndó ña on vá'a, ta saá yóo ndó ndikon ndó ndatan nixiyo ña Sara kuia xina'á.

⁷ Ta ndó'ó, nañani yó na yóo násí'í, xini ñó'ó vivii kutaku ndó xí'in násí'í ndó. Kasa to'ó ndó ná, vará lo'o ndee kómí ná noo ñandee kómí ndó, chi násí'í ndó yó'o ñii káchí naki'in ná xí'in ndó ñava'a ña kúu ña kutaku ndó xí'in Ndios ndi'i saá kivi ña vaxi. Tá va'a kisa ndivi ndó saá xí'in násí'í ndó, ta on kóo ña kasi noo to'on ndó, ña koni so'o Ndios ña ká'an ndó xí'in ra.

To'on yó'o ká'an ndasaá xó'vi nivi vará ké'é na ñava'a

⁸ Vitin ká'an̄i xí'in ndi'i ndó. Xín̄i ñó'ó vivíi kutak̄u ndó xí'in tá'an ndó ta koo yu'ú ndó xí'in tá'an ndó; kundá'ví ini ndó koni tá'an ndó; kuki'vi ini ndó koni tá'an ndó ndatán kí'vi ini ndó xíni ndó ñani m̄ji ndó xí'in k̄i'va m̄ji ndó. Chindeé tá'an ndó xí'in ña xín̄i ñó'ó ndó; ta ká'no koo ini ndó xí'in tá'an ndó. ⁹ Tá yóo n̄ivi na ké'é ña ɔn vá'a xí'in ndó, ta ɔn ke'é ndó ña ɔn vá'a xí'in na. Tá yóo n̄ivi na ká'an̄ tɔ'on ndiva'a xí'in ndó, ta ɔn k̄a'an̄ ndó tɔ'on ndiva'a xí'in na. Xín̄i ñó'ó ndukú ndó n̄o Ndios ña ké'é ra ñava'a xí'in n̄ivi na ké'é án ká'an̄ ña ɔn vá'a xí'in ndó, saá chi Ndios nākaxin ra ndó'ó ña ké'é ndó ñava'a xí'in n̄ivi. Ta x̄a'a ñayó'o ndó'ó ndixa naki'in ndó ñava'a n̄o Ndios. ¹⁰ Ta tɔ'on Ndios ña n̄ita na x̄ina'á, káchí ña saá:

Tá kóni ndó s̄ij kutak̄u ndó, ta ñii k̄i'va saá kóni ndó va'a koo ndó ñoyívi yó'o,
ta saá kundaa va'a xí'in m̄ji ndó ña ɔn k̄a'an̄ ndó tɔ'on ndiva'a x̄a'a n̄ivi,
ni ɔn k̄a'an̄ ndó ñavatá ña sandá'ví n̄ivi.

¹¹ Sandakoo ndó ké'é ndó ña ɔn vá'a, ta xín̄i ñó'ó ké'é ndó ñava'a.

Ndixa chikāa ndó ndee ña ndukú ndó va'a kutak̄u ndó xí'in n̄ivi.

¹² Chi Ndios ndáa ra n̄ivi na ké'é ñandaa,
ta xa yóo ti'va ra ndakuijn ra x̄a'a ña ndúkú na n̄o ra,

ta Ndios sáa ini ra xíni ra n̄ivi na ké'é ña ɔn vá'a, saá káchí tɔ'on Ndios.

¹³ Tá chíkāa ndó ndee ña ké'é ndó ñava'a, ta saá, ¿yu kúu n̄ivi ké'é ña ɔn vá'a xí'in ndó? ¹⁴ Ta saá ni, tá xó'vi ní ndó vará ké'é ndó ñava'a, ta Ndios chindeé ra ndó'ó ña kunakāa ñas̄ij ini ndó. ɔn kuyi'ví ndó n̄o nda ñii n̄ivi, ta ni

on kundi'i ini ndó ña on vá'a ke'é na xí'in ndó. ¹⁵ Ta xí'in ña ndino'o ini ndó kasa to'ó ndó Jesucristo, chi taKá'no ño yó kúu ra. Tá yóo ñivi na ndaka to'on ndó'ó: “¿Ndachun kándixa ndó Jesucristo?”, kachí na xí'in ndó, ta ndó'ó xa koo ti'va ndó ndakuijn ndó ndato'on ndó xí'in na xa'a ña ndachun ndáa ini ndó Jesucristo, ta ndáa ini ndó ña ndixa kasa ndivi ra ña kindo ra xí'in ndó, ta xí'in ñato'ó ka'an ndó xí'in na ta vivii ndakuijn ndó yu'u na. ¹⁶ Kasa ndivi ndó ñava'a ta vivii kutaku ndó ña on koo ña sandi'i ini ndó ño Ndios. Ta saá, tá ká'an ndiva'a ñivi xa'a ndó'ó, ta kuka'an ño na xa'a to'on vatá ká'an na, chi xíto na ñava'a ké'é ndó xa'a ña ndikõn ndó Jesucristo. ¹⁷ Tá taxi Ndios ña xo'vi ndó, ta va'a ka ná xo'vi ndó xa'a ña ké'é ndó ñava'a ño ña xo'vi ndó xa'a ña ké'é ndó ña on vá'a.

¹⁸ Saá chi mji Jesucristo ñixo'vi ra ta ñixi'i ra ñii laá yichi xa'a ndi'i kuachi ñivi. Ta ta va'a kúu ra, ta on koó kuachi kómí kúu ra, ta ñixo'vi ní ra xa'a ndi'i mji yó ñivi na ndiso kuachi; ke'é ra saá ña kuchiño kuyatin yó ño Ndios ta kutaku yó xí'in ra ndi'i saá kivi. Tá saxo'vi ní ñivi yiki koñu Jesucristo ta xa'ni na ra, ta nataku ra ño ña ñixi'i ra, ta ndixa táku ndino'o ra vitin. ¹⁹ Tá mií on ta'an nataku Jesucristo, ta Níma ra kee ña ñixa'an ña ñika'an ndoso ña ño níma ñivi na ñixi'i kuyá xina'á, níma ñivi ña ñó'o ñii xiiña ña yóo ndatán yóo ñii ve'e ka. ²⁰ Ta ñivi yó'o xikuu na xitaku kuyá xina'á xí'in taNoé, ta ke'é na ndi'i ño ña on vá'a ña on vása kóni Ndios. Ta Ndios taxi ra ndayí nda'a taNoé ña kasa va'a ra tón barco, ta ku'a ní kuyá kúva'a tón barco yó'o, ta ndi'i saá kuyá yó'o Ndios xí'in ña ká'no

ini ra x̄indati ra ña nandikó ini ñivi yó'o x̄a'a ña ɔn vá'a ké'é na. Ta ndasaá kuiti ɔna ñivi x̄ikuu na x̄iño'o ini tón barco, ta ñikaku na ño ña ka'a na ini takuií. ²¹ Ta vitin m̄i yó, x̄a'a ña kándixa yó Jesucristo, chíchi yó ini takuií, ta ndatán Ndios sakaku ra taNoé kuiya x̄ina'á ña ɔn ka'a ra ini takuií, saá sakaku ra m̄i yó ña ɔn ndi'i x̄a'a yó. Ta ña xa chíchi yó saá, ɔn s̄ivi x̄a'a ña ndundii ȳikí koñu yó x̄ikuu ña. Saá chi ña xa chíchi yó kóni kachí ña ndí xa k̄indoo yó x̄i'in Ndios ña kutaku ndii yó ño ra. Ta x̄a'a ña natak̄u Jesucristo, Ndios kúchiño sakaku ra m̄i yó. ²² Ta Jesucristo ndaa ra kuano'o ra ñoyívi ñino, ta yóo ra siin kua'á Ndios, ta xá'nda chiño ra ño naángel ta xá'nda chiño ra ño ndi'i ndee ña kómí ndayí ñoyívi ñino.

4

Tɔ'on yó'o ká'an ndí x̄ini ñó'ó vivíi kasa ndivi yó ndatán kóni Ndios

¹ X̄a'a ña ñix̄o'vi ní Jesucristo x̄a'a yó tá'an x̄itaku ra ñoyívi yó'o, ta ñii k̄i'va saá ndó'ó x̄ini ñó'ó sakuá'á ndó ña koo ti'va ndó ña x̄o'vi ndó x̄a'a ña ndíkɔn ndó Jesucristo. Chi ñivi na xó'vi x̄a'a Jesucristo, nayó'o xa sandakoo na yich̄i ño ké'é na ña ɔn vá'a. ² X̄a'a ña ñix̄o'vi ní na x̄a'a ra, ñivi na ndíkɔn Jesucristo ɔn vása kisa ndivi ka na ña ɔn vá'a kóni ȳikí koñu m̄i na, nda víka ndi'i saá k̄ivi táku na ñoyívi yó'o chíkaa na ndee ña kasa ndivi na ña kóni Ndios. ³ Chi xa kua'a ní kuiya x̄itaku ndó ké'é ndó ña ɔn vá'a ña kútoo ní ñivi ñoyívi yó'o na kúu na ɔn vása

kándixa Ndios. Xikuu ndó nataa na xikutoo ní kivi kuachi ñoyívi xí'in náña'a ná on sivi násí'í ndó kúu, án xikuu ndó náña'a ná xikutoo ní kivi kuachi ñoyívi xí'in nataa na on sivi yii ndó kúu, ta kisa ndivi ndó ndi'i ña on vá'a ña kutoo ní yiki koñu mji ndó; xikuu ndó ñivi na xi'i ní nduta tá sáxíini ñivi; xikuu ndó ñivi na ñixika noo kana viko noo ke'é ndó ndi'i saá noo ñakini ña káchí ini mji ndó; ta inka ña kini ní ke'é ndó xikuu ña kisa to'ó ndó ña kúu ídolo án ñaimagen ña on sivi Ndios ndino'o kúu. ⁴ Ta vitin ñivi natá'an ndó na si'na ñii káchí ñixika ndó xí'in, nayó'o on vása kúndaá ini na ndachun on xiin ka ndó nakutá'an ndó xí'in na ta ke'é ndó ña on vá'a ke'é na, ta saá xa'a ña on vása táku ka ndó ndatán táku nayó'o kúu ña ká'an na to'on ndiva'a xa'a ndó vitin. ⁵ Ta on kundi'i ini ndó, chi kixaa ñii kivi nanjivi yó'o ndakuin na noo Ndios xa'a ndi'i ña on vá'a ke'é na, chi Ndios xa yoo ti'va ra kasa nani ra xa'a kuachi ndi'i ñivi, án na táku kúu na, án na xa ñixi'i kúu na. ⁶ Ta Jesucristo ñixa'an ra noo ñivi na xa ñixi'i, ta ñika'an ndoso ra to'on va'a xí'in na xa'a ña kuchiño kutaku níma na xí'in Ndios, vará yiki koñu na ña xa ndi'i xa'a kúu ña, chi ñixi'i na, ndatán chindú'u Ndios ndi'i ñivi kivi na xa'a kuachi na.

⁷ Xa yatin vaxi ña kixaa kivi sondí'í ñoyívi yó'o. Ta saá xini ñó'ó vivii ndino'o kundito ndó ña koo ti'va ndó kasa ndivi ndó ña kóni Ndios, ta ndi'i saá kivi taxi ndino'o xí'in mji ndó ña ka'an ndó xí'in Ndios. ⁸ Ña ká'no ka xini ñó'ó kasa ndivi ndó kúu ña xí'in ndi'i níma ndó kuki'vi ini ndó koni tá'an ndó, chi tá va'a kisa ndivi ndó ñayó'o, ta saá ndixa yoo ti'va ndó kasa ká'no ini

ndó x̄a'a ña ɔn vá'a ke'é natá'an ndó x̄i'in ndó, vará kūa'a ní ña ɔn v̄a'a ke'é nayó'o. ⁹ Ta vivii naki'in ndó n̄ivi na kándixa Jesucristo na kixaa ve'e ndó, ta x̄i'in ñasij ini ndó ke'é ndó ñava'a x̄i'in na, ta ɔn ka'an kuáchí ndó x̄a'a ña ké'é ndó saá. ¹⁰ Ndios saní'i ra ndee va'a nda'a ñii ñii ndó, ta ñii ñii ndó x̄ini ñó'ó konj ñó'ó ndó ndee va'a yó'o ña chindeé tá'an ndó. ¹¹ Tá Ndios saní'i ra ñava'a sava ndó'ó ña kúchiño ndó ka'an ndoso ndó to'on ra noo n̄ivi, ta x̄ini ñó'ó ka'an ndó to'on ña ndaa ña ndixa vaxi noo Ndios. Tá Ndios saní'i ra ñava'a sava ndó'ó ña kúchiño ndó kasa ndivi ndó chiño va'a ña x̄ini ñó'ó natá'an ndó, ta saá kasa ndivi ndó chiño yó'o x̄i'in ndee ña ndixa vaxi noo Ndios. Ta ñii ñii ñava'a ké'é ndó, vivii kasa ndivi ndó ña x̄a'a n̄ivi na x̄ito ñava'a yó'o ña kuchiño kasa ká'no na Ndios, saá chi Jesucristo kúu ta chindeé n̄ivi ña kasa ká'no na Ndios. Ta xa kánóo síkón ñato'ó ká'no Jesucristo, ta xa kómí ra ndee ña xá'nda chiño ra ndi'i saá kij̄i noo ndi'i ña yóo ñoyívi. Saá ná koo ña.

Tɔ'on yó'o ká'an x̄a'a n̄ivi na ndíkɔn Jesucristo xó'v̄i ní na ñoyívi yó'o

¹² Nañani yó x̄i'in náki'va yó, na kí'vi ní ini j̄ x̄ini j̄ kúu ndó'ó. ɔn naka'nda ini ndó chi xa xó'v̄i ndó ña yɔ'v̄i ní ña kúu ña x̄ito ndoso ndó'ó, ta ɔn kani sinj̄ ndó ndí ndasaá kuiti m̄ji ndó kúu na xó'v̄i ní x̄a'a ña kándixa ndó Jesucristo. ¹³ Nda víka, ná kunakaa ñasij ini ndó x̄a'a ña xó'v̄i ndó ndatán yóo ña n̄ixɔ'v̄i ní Jesucristo. Ta saá ndixa kutú ndaa ka ñasij ini ndó kij̄i ndikó ra ñoyívi yó'o x̄i'in ndi'i ñava'a ká'no ña livi yé'e. ¹⁴ Tá yóo n̄ivi na ká'an to'on ndiva'a x̄i'in ndó chi na

ndíkɔn Jesucristo kúu ndó, ta x̄'a ñayó'o ná kunakaā ñasij̄ ini ndó. Chi Níma Ndios ña kúu ña ndino'o ká'no, yóo ña x̄'in ndó ndi'i saá k̄iv̄i. Ta ñivi na ɔn vása kándixa Ndios ká'an ndiva'a na x̄'a Níma ra, ta ndó'ó na kándixa Ndios ndixa kisa ká'no ndó Níma ra. ¹⁵ Tá xó'v̄i ní ndó, ta va'a ná ɔn kuu ña x̄'a ña x̄'ni ndó ñivi, ni x̄'a ña k̄isa kuí'ná ndó, ni x̄'a ña ke'é ndó ink̄a ɔo ña ɔn vá'a ña yá'a ndoso ndó ndayí, ni x̄'a ña sakuiso chiño x̄'in m̄ji ndó ká'an ndó x̄'in ink̄a ñivi ndasaá x̄in̄i ñó'ó kasa ndivi na chiño m̄ji na. ¹⁶ Tá xó'v̄i ndó x̄'a ña kúu ndó ñivi na ndíkɔn Jesucristo, ta saá ɔn vása kuka'an ɔo ndó x̄'a ña ndíkɔn ndó ra, ta nda víka kasa ká'no ka ndó Ndios x̄'a ña ink̄a ñivi ndixa nakoni na ndí ndó'ó kúu na kándixa Jesucristo.

¹⁷ Saá chi vitin xa k̄ixaā k̄iv̄i ña kixá'á Ndios kasa nani ra x̄'a ndi'i ñivi ndatán yóo ña ke'é na, ta si'na kixá'á ra kasa nani ra x̄'a ñivi na kándixa ña'á. Tá vitin xa kixá'á ra x̄'in m̄ji yó ta xó'v̄i ní yó, ta ndeé ní ka xó'v̄i ñivi na nda lo'o ɔn x̄in chikaā so'o to'on va'a ña ñika'an Ndios. ¹⁸ Chi to'on Ndios ña ñitaa na x̄ina'á, káchí ña saá: Ta ñivi va'a, kundo'o ní na ta yo'v̄i ní taxi na m̄ji na ña sakaku Ndios na, ta saá, yo'v̄i ní ka kuchiño kaku ñivi na ké'é ña ɔn vá'a, na ɔn x̄in kandixa Ndios, káchí to'on Ndios. ¹⁹ Ñakán ndó'ó, tá xó'v̄i ndó chi saá taxi Ndios kundo'o ndó, ta ɔn vá'a sandakoo ndó ké'é ndó ñava'a x̄'in ink̄a ñivi, ta ndixa x̄in̄i ñó'ó nataxi x̄'in m̄ji ndó nda'a Ndios, chi Ndios kúu ta ta k̄isa va'a ndó'ó, ta ndixa kisa ndivi ra to'on ra ña k̄indoɔ ra x̄'in ndó.

5

*Tɔ'on yó'o ká'an ndasaá xínì ñó'ó
kutaku na ndíso chiño nɔɔ nivi na kándixa
Jesucristo*

¹ Vitin ká'an ì xí'in ndó'ó nañani yó, naxikua'a na ndíso chiño nɔɔ nivi na kándixa Jesucristo, saá chi yì'ì, ndatán yóo ndó'ó na ndíso chiño, saá yóo ì. Ta yì'ì xìnì káxín ì ña ndasaá nixò'vì ní Jesucristo xa'a ndi'i yó. Ta kivi ndikó Jesucristo ñoyivi yó'o, ta saá koto yó ña yé'e livi xí'in ñandee va'a ká'no ña kómí ra. Ta saá ñoyivi njino ñii káchí xí'in ra kukomí yó ña yé'e livi xí'in ndee va'a ká'no yó'o. ² Xáku ndá'ví ì nɔɔ ndó, va'a kundaa ndó nivi na nákutá'an xí'in ndó xa'a ña kándixa na Jesucristo. Ndatán va'a vivii ndáa ñii ta ndikachi sana ra, saá va'a kundaa ndó nivi yó'o, chi Ndios sakuiso chiño ra ndó'ó ña kasa ndivi ndó saá xí'in na. Ná on kuu ña kundaa ndó na xí'in ñanduxa, ná on kuu ña kundaa ndó na xa'a si'un, ta va'a xí'in ñasi ini ndó kundaa ndó na, ta xí'in ndino'o nímá ndó kasa ndivi ndó ña kóni Ndios. ³ On kani sìnì ndó kómí ndó ndi'i nɔɔ ndayí ña ka'nda chiño ndó nɔɔ natá'an ndó na kándixa Jesucristo na kúu na ndíso chiño ndó xí'in. Ta xínì ñó'ó si'na mii ndó vivii kuni'i ndó yichì va'a kutaku ndó nɔɔ nayó'o, ta saá kuchiño na kundikon na yichì ndó. ⁴ Saá chi ñii kivi ndikó tuku taKá'no va'a nɔɔ yó ñoyivi yó'o. Ta mii ra kúu taKá'no va'a nɔɔ ndó'ó na ndíso chiño ta vivii ndáa ndó natá'an ndó na kándixa Jesucristo. Ta kivi ndikó ra, ta saá taxi ra nda'a ndó ñava'a ña livi ká'no ña nda lo'o on vása ndi'i xa'a nda ñii kivi.

⁵ Ta ndó'ó ñivi nakuáchí na kándixa Jesucristo, xínì ñó'ó kasa to'ó ndó nataa naxikua'a na ndíso chiño xí'in ndó, ta kasa ndivi ndó to'on ña ká'an na xí'in ndó. Ta ndi'i ndó'ó ñivi na kándixa Jesucristo, xínì ñó'ó kasa ñiño xí'in mji ndó, ta xí'in ñato'ó chindeé tá'an ndó, chi to'on Ndios ña ñitaa na xina'á, káchí ña saá:

Ndios on xijn ra koni ra ñivi na kisa ká'no xí'in mji,

ta ndixa ké'é ra ñava'a xí'in ñivi na kisa ñiño xí'in mji noo ra,

káchí to'on Ndios. ⁶ Ta xa'a ñayó'o, kasa ñiño xí'in mji ndó noo ndee Ndios, ta saá kixa kivi ña chitóni Ndios, ta ndixa kasa ká'no ra ndó'ó.

⁷ Taxi ndó ndi'i ña sándi'i ini ndó nda'a Ndios, chi tayó'o kí'vi ní ini ra xíni ra ndó'ó ta ndáa ra ndó'ó.

⁸ Ta saá xínì ñó'ó vivii ndino'o kundito ndó ña koo ti'va ndó kasa ndivi ndó ña kóni Ndios, ta koto va'a ndó chi ñandiva'a ká'no ndixa sáa ní ini ña xíni ña ndó'ó, ta ndatán xíka ñii tíleón tí xí'j ní soko nándukú rí ña kaxi rí, saá xíka ñandiva'a yó'o satá ndó. ⁹ Chika ndó ndee xí'in mji ndó ña on kasa ndivi ndó ña kóni ñandiva'a ká'no. Ta xí'in ña ndino'o ini ndó xínì ñó'ó kandixa ndó Jesucristo ta nda lo'o on sandakoo ndó ña ndixa ndáa ini ndó ra, saá chi xa xínì ndó ndí ndi'i saá xiiña ñoyívi yó'o xó'vì ní nañani yó xí'in náki'va yó na kándixa Jesucristo, ndatán xó'vì ndó vitin. ¹⁰ Tá xa ndi'i ñiya'a ña ñixo'vì ní ndó, vará nda lo'o kivi án kuiya ñixo'vì ní ndó, ta Ndios taxi ra ña tuku va'a kutaku ndó. Chindeé ra ndó'ó ña nda ñii kivi on sandakoo ndó kándixa ndó ra, ta taxi ra ndee ra nda'a ndó ña on nakava ini ndó, ta kasa ndivi ra ñava'a

xí'in ndó ña chindeé ra ndó'ó ña ndixa ndino'o ini ndó kandixa ndó ra ndi'i saá kivi ña vaxi. Ndixa mji Ndios kasa ndivi ra to'on ra xí'in ndó xa'a ña kí'vi ní ini ra xini ra ndó'ó, saá chi xa kana ra ndó'ó nivi na kándixa Jesucristo ña kutaku ndó xí'in ra ndi'i saá kivi ñoyívi nino noo yóo ñava'a ká'no livi. ¹¹ ¡Ná kasa ká'no yó Ndios ndi'i saá kivi, ta ndi'i saá kivi ná ka'nda chiño ra noo ndi'i ña yóo ñoyívi! Saá ná koo ña.

Ñayó'o kúu to'on sondí'í ña nītaa taPedro noo tutu yó'o

¹² Ta ñani yó taSilvano, xí'in ña ndino'o ní ini ra ndikōn ra Jesucristo, tayó'o chindeé ra yi'í ña nītaa ra to'on noo tutu yó'o ña kúu ña nīxaa nda'a ndó, chi kóni i ndato'on i xí'in ndó ndasaá viví xini ñó'ó kutaku ndó, ta ndato'on i xí'in ndó ndí ndi'i ñava'a ké'é Ndios xí'in ndó kúu ña sáná'a ndí ndixa kí'vi ní ini ra xini ra ndó'ó. Ta saá nda ñii kivi on vá'a nandoso ndó ña ndixa kí'vi ní ini Ndios xini ra ndó'ó.

¹³ Nivi na kándixa Jesucristo na táku ñoo Babilonia yó'o, tí'ví na to'on ña chindeé na ndó'ó. Nivi yó'o kúu na nakaxin Ndios ñii káchí ndatán nakaxin ra ndó'ó ña nduu ndó sa'ya ra. Ta ñani yó taMarcos ta yóo ndatán yóo sa'ya i, tí'ví ra to'on chindeé ra ndó'ó. ¹⁴ Ta xí'in ña kí'vi ní ini ndó xini tá'an ndó, chindeé tá'an ñii ñii ndó xí'in ña chito ndó noo tá'an ndó.

Ná koo ñava'a ini ndi'i ndó'ó, nivi na kándixa Jesucristo. Saá ná koo ña.

**Alcatlatzala Mixtec New Testament
Mixtec, Alcatlatzala: Alcatlatzala Mixtec New
Testament (New Testament+)**

copyright © 2019 Wycliffe Bible Translators, Inc.

Language: Mixtec, Alcatlatzala

Contributor: Wycliffe Bible Translators, Inc.

All rights reserved.

2020-11-11

PDF generated using Haiola and XeLaTeX on 21 Feb 2024 from source
files dated 29 Jan 2022

a74bfb3f-bd55-5ab9-983e-8d19de48c198